

*2^r

Dem Wolgebornen vnd
 Edelen Herrn/ Herrn Wolraden/
 Grauen zu Waldeck/ ꝛc. Mei=
 nem gnedigen Herren.
 Gnade vnd Friede von Gott dem
 Vater/ sampt warhafftigem erkendtnus/ fei=
 nes lieben Sohns / vnfers einigen Heylandes
 Jhesu Chrifti/ Auch beharlicher beftendigkeit/
 in reiner vnuerfelfcheter Lehre des H. Euan=
 gelij / vnd meinem demütigen gebete / ꝛc. zu=
 uorn.

WOLgeborner vnd
 Edeler Graue/ Gnediger
 Herre/ Es zeuget die gantze heili=
 ge Schrift / vnd aller zeiten Ex=
 empel/ das der ewige/ gütige Gott/ alle weg
 diefe weiße gehalten/ Das / ehe er ein Landt/
 Volck/ oder Stadt/mit endlichem verderben
 daheim gefuchet / Er allezeit zuuorn / feinen
 zorn vnd künfftige ltraffen/ geoffenbaret / vñ
 die menfchen dauor gewarnet / vnd das etwa
 durch fonderliche zeichen/ oder auch kleine ge=
 meine Erinnerungs ltraffen/Etwa aber / vnd
 am aller gewönlichften / durch fein H. wort/
 * ij welches

*2^v

welches Er in den mundt feiner Diener / der Propheten/ Apolteln/ vnd aller Chriftlichen Lehrer/geleget/ Alfo/ das in alle weg beftehet/ der ſpruch des H. Propheten Amos 3. Der Herre thut nichts / er offenbare denn fein geheimnus/ den Propheten feinen knechten. Denn nach deme vnd als der fromme/ gütige Gott/ (vermüße feines warhafftigen eydes/ Ezech. 18. vnd 33.) jhe nicht luft hat an jemandes tode vñ verderben/ fondern wolt viel lieber/ das jederman felig vnd erhalten würde / fo füret er dieſe obbemelte weiße alfo / Erftlich / das er die Gottlofen hierdurch zur buße ermane / oder jhres wol vnd mutwillig verdienten verdammus vberzeuge/ Darnach/ das er die frommen vñ Gottsfürchtigen auffſ künftige vnglück rüfte vnd tröfte / Damit er denn alfo allenthalben/ feine Veterliche güte vñ gnade / wie in allen / alfo auch in deme erzeige vnd beweife.

Ob nu wol die ftoltze / hoffertige arge Welt/ auch folche warnungen/ allezeit/ fonderlich aber jetzt vor dem ende derfelben / vmb der vnmündigkeit willen deren / dadurch der Groffe Gott (des ftercke inn den ſchwachen mechtig) dieſelben vortragen leffet/ gar redlich vnd meifterlich zuuerachten weis / vnd

ftracks

*3^r

tracks jhr gelechter daraus treibet / Jedoch/
 fo sollen alle trewe Chriftliche Lehrer vnd Pre=
 diger / der welt spott vnd lachen hindan ge=
 fetzet/ jhr ampt hierumb nicht alleine nicht vn=
 terlaffen/ sondern auch jimmer jhe mehr vnd
 mehr anhalten / Wie Gott zu Ezechiel faget/
 man höre es/ oder laffe es/ Es helffe oder helf=
 fe nicht / Ja sie sollen als die klugen vnd ver=
 ftendigen Haushalter vnd Ausfpender Gött=
 licher geheimnus / aus dem vnerfchöpflichen
 fchatze Göttliches wortes / altes vnd neues/
 vornemlich das jhenige herfür fuchen/ das
 allenthalben zu warnunge der menschen / am
 aller meiften dienftlich ift / Damit sie also / als
 trewe Diener / werckzeuge vnd gnaden gefeffe
 Gottes/ jhr liebes Ampt/ Gotte zu ehren/ den
 Frommen zu troft / den Böfen zur befferung
 oder zeugnus/ Jha auch endtlich zu rettunge
 jhrer gewiffen/ trewlich ausrichten/ Vnd ni=
 cht der mal eins/ vor der verdampften welt
 blut/ rechenfchafft geben müffen.

Demnach/ als nu ich vnwürdiger Die=
 ner Chrifti/ vnd feines heilfamen worts/ in er=
 innerung meines lieben amptes/ je auch gerne
 das meine dabey thun wolte/ das jederman
 vor den woluerdienten / vnd freilich gar nahe
 vorftehenden künftigen ftraffen / gewarnet

* iij würde/

*3^v

würde / Vnd es aber gewißlich dauor gehalten/ das hierzu die schreckliche Exempel/ des Jüdischen volcks / eben der letzten welt zum fürbilde Göttliches zorns vorgefellet / vnd deme nach zur warnung gantz dienftlich fein folte/ So habe ich daffelbe/ wie es in der Hiftorien auff die kürzeste/ aus dem Hebraischen Josepho zusammen gezogen/ in gemeine Deutsche sprache / (damit es auch jederman zu gemeinem nutz keme) transferirt vnd vmbgeschriben.

Vnd bitteden Allmechtigen/ Ewigen/ gütigen Gott/ das Er durch seinen H. Geift/ vnser hertzen gnediglich erleuchten wolle/ Das/ so oft wir diese schreckliche Hystori/ hören oder lesen/ wir neben dem grewlichen jammer/ so vber die volck ausgechüttet / Auch die vrsache / womit sie ihnen zu haufe geladen/be-trachten mögen/ Hiernach auch die gelegenheit jetziger welt/ dabey bedencken / Denn also wirdt sich gewißlich erweiter Hiftorien nutz finden vnd erweisen/ Das / was noch von den Gottlofen zu gewinnen / sich warnen lassen/ oder jhe vberzeuget sey vnd bleibe/ Die Frommen aber / auff das künftige vnglücke gerüftet/ vnd mit rechtem troste verfehen werden/ Amen.

Vnd

*4^r

Vnd das wir den Einfeltigen zur An=
 leitunge / Erftlich von dem erbermlichen Ja=
 mer dieses volckes fagen/ Welches Exem=
 pel Göttliches zorns / mag man mit diefem
 vergleichen? Schrecklich vnd Erbermlich
 ifts/ das Gott die Erfte Welt / mit der Sindt=
 flut ftraffet / vnd alles was einen lebendigen
 Athem hat/ erfeuffet/ Gleich wie es auch
 graufam vnd fchrecklich ift / das Sodom vñ
 Gomorrha / mit feuer vom Himmel herab/
 verbrennet vnd verfencket wirdt / Es wirdt
 auch ein mal graufam / vnd den Gottlofen er=
 fchrecklich fein/am Jüngften tage / wenn die
 gantze Welt / widerumb wirdt Liechter lohe
 brennen/ vnd alles mit einander zurpuluert
 werden / Aber gar weit vbertrifft dis Exem=
 del/ des zorns Gottes / die andern all zu mahl/
 Dann jhenes findt ftraffen / da ein vnglück
 alleine wütet vnd wegremeit/ Als inn der
 Sindtflut/ das Waffer/ In der verwüftung
 Sodoma/ das Feuer/ Hier aber find man=
 cherley vnglück / als Krieg/Thewrung/ Hun=
 ger/ vnd Pestilentz/ zugleich mit einander vor
 vnd eingefallen / welche alle femptlich vñ fon=
 derlich gewütet vñ gewüftet/ alfo/ das es auch
 fchier vngleublich/vñ gantz erfchrecklich ift zu
 lefen/ Jhene ftraffen find augenblicklich vnd
 * iij behende

*4^v

behende ergangen / Diefe aber gar langwirig
 vnd beharlich/ Der erbermliche krieg/ dadurch
 das Jüdifche landt / vnd die Stadt Hierufa=
 lem/ zerftöret ift worden/ hat wol in die Sie=
 bendthalb jhar gewehret / vnd haben in diefer
 zeit/ jetzt erwente vnglück alfo gewütet / das
 auch die leute/ der natürlichen affect vnd nei=
 gungen/ aller dinge gegen einander vergeffen/
 an einander felbs zu fchenden/ würgen / fchla=
 chten/ freffen / vnbegraben vor die hunde zu
 werffen / mit folcher vnmenfchlichen verfto=
 ckunge/ das da weder Gottes noch der men=
 fchen warnen / flehen / bitten/ oder erbiten/
 (vngeachtet / das fie wol gefehen/ das es mit
 jhnen verloren) zu enthebung jhres eicten jam=
 mers vnd vnglücks / hat helffen mögen / bis
 das Landt vnd Leut/ vnd alles / zu drüm=
 mern vnd boden gegangen ift / Hat fie auch
 nichts geholffen/ ob fie fich fchon etwa vnter
 den Rhömifchen folgenden Keyfern / Adria=
 no/ Juliano/ Gallo/ vnd andern/ wider auff=
 zuraffen vnterwunden/ Die verwüftung
 war da/ fie muften getilget vnd gedempffet
 fein/ Wie wir fehen auff heutigen tag / das dis
 Jüdifche volck / nu vber die Anderthalb tau=
 fent Jhar / das elendefte / zerjehete/ vnd zer=
 plaget volck / vnter der Sonnen ift/ Vnd
 follens

*5^r

folpens jederman / zum Exempel Göttliches
 zorns/ bleiben /bis ans ende der welt / wie jhnen
 Pfalm. 59. vnd Daniel. 9. geweyffaget ift /
 Es foll vnd kan Gott feines zorns vber jhnen
 nicht gerawen.

Zwar in deme ift diefe zeitliche ftraffe /
 den obangezeigten gleich / das fie noch fich/
 vber die Gottlofen vnd vnbußfertigen / auch
 die ewige mitte gezogen vnd gebracht hat/
 Doch aber auch gröffer denn die vorigen / in
 deme/ das hie zu gleich/ zeiliche vnd ewige
 ftraffe anhebet / Deñ nach deme fie mit blindt=
 heit gefchlagen worden / find fie auch hie zeit=
 lich/ von Gott vnd aller feiner himlifchen gü=
 ter gemeinfchafft / gefchieden/ O jammer
 vber jammer/Es waren Jüden/ Jfraheliten/
 vnd Abrahams famen / nicht Heyden /wie die
 Sodomiten/ vñ wir auch etwa gewefen find/
 nicht ein vngefaffeter gemengeter hauffe / wie
 in der erften welt/ Sie waren das außewelete
 Volck/ von Gott/ vor allen vólckern auff er=
 den / erkoren / mit groffen wundern vnd wer=
 cken fortbracht / Von mancherley feinden er=
 rettet/Gezieret mit allerley herrligkeit/ des Prie=
 fterthumbs/ Regiments/ Landen vnd Leu=
 ten/ Von denen/ nach dem fleifch/ Gottes
 Sohn geboren/ Summa/ dergleichen fonft

* v kein

*5^v

kein volck auff erden gewefen / Pfalm 147.
 Noch/ da sie Gotte dem Herrn / in seinen zorn
 vnd gericht gefallen/ Sihe/ da mus es alles zu
 drümmern gehen/ Prierterthumb vnd Regi=
 ment/ Landt vnd Leute/ Tempel vnd Gottes=
 dienft/ Leid vnd Leben/ etc. Vnd das so greu=
 lich / das es ohne threnen kaum mag gehört
 oder gelefen werden/ Jch meine jha / dis sey ein
 erbermlich Exempel / des Göttlichen zorns vñ
 ftraffen/ an seinem eigenen volcke.

II. Ferner/ Was ist aber dieses graufamen
 zorns/ vnd schrecklichen ftraffen / vrfach ge=
 wesen/ Womit haben sie es doch jmmermehr
 verdient? Dis können wir aus dem Munde
 der warheit selbs hören/ von vnserm lieben
 Herrn vnd Heylande/ Jhesu Chrifto / welcher
 als Er das vorgemelte vnglück/ vber die Jü=
 den/ künfftig sahe/ vnd auch lange zuuor mit
 Threnen warnete / setzet Er diese vrfache/ da=
 mit sie solche ftraffe auff sich geladen / Dar=
 umb/ spricht Er / (Luce 19.) ifts zu thun/
 Das du nicht erkennet haft die zeit/
 darinnen du heimgefucht bist. Es
 heiffet aber allhie der Herre Chriftus / die zeit
 der heimfuchunge/ anders nichts/ denn die zeit
 des Offenbahreten Euangelij / welches / wenn
 vnd wo es geprediget wirdt / mag man recht
 vnd

*6^r

vnd wol fagen/Das Gott die menfchen heim=
 fuchet/ Denn da fchleußt Gott den Himel felbs
 auff/ vnd in deme Er durch fein H. wort leh=
 ren lef/ Was man gleuben / Wie man leben/
 Wie man fich inn allem vnglücke tröften foll/
 Wo man vergebunge der Sünden vnd ewi=
 ges Leben finden vnd erlangen foll / fuchet er
 die menfchen nicht alleine mit gnaden daheim/
 Sondern er holet fie felbs anheim. Ja war=
 lich/ alfo wahren die Jüden/ von Gott dahei=
 me gefuchet/ durch die Propheten/ Johan=
 nem/ Chriftum felbs/vnd feine lieben Apoftel/
 Aber was faget hie der Herre? Sie habens ni=
 cht erkennen/ Ja wol nicht erkandt/ Man fehe
 an/ durch aus alle Stende / beyder Regiment/
 fampt dem gemeinẽ hauffen des Pöfelvolcks/
 da wirdt man es genugfam finden.

Der Geiftliche Standt/war aller dinge/
 wie die H. Propheten hin vnd wider von
 fchreiben/Efaiaë 56. Ihre Wechter find blind/
 fie wiffen alle nichts/ Stumme hunde find fie/
 die nicht ftraffen können/ findt faul / ligen vñ
 fchlaffen gerne/ Es findt aber ftarcke Hunde
 von leibe/ die nimmer fatt werden können.
 Jeremiaë 5. Die Propheten lehren falch/
 vnd die Priefter herfchen in jhrem Ampte.

Jtem

*6^v

Jtem Tren. 2. Deine Propheten haben dir lofe vnd tōrichte gefichte geprediget / vnd dir deine miſſethat nicht geoffenbaret / damit ſie dein gefengknuß gewehret hetten/ Sondern haben dir geprediget lofe predigt / damit ſie dich zum lande hinaus predigten.

Wie warnet der Herre vor jhnen/ Matt. 7. vnd 16. ? Wie beſchreibet er ſie mit jhren eigenſchafften/ vnd ruffet ſo kleglich vber ſie/ Matt. am 23. ? Jch meine ja / es ftunde vmb ſie/ Sie ſolten die zeit der heimfuchunge erkandt / vnd die reine Lehre von Johanne/ Chriſto/ vnd ſeinen Apoſteln/ auff vnd angenommen haben/ etc. So waren ſie derſelben ergelte feinde / Vnd wie ſpaltig ſie ſonſten / in drey Heuptſecten zertheilet/waren/ ſo einig waren ſie/ der rechten lehre zu widerſprechen/ Das war der liebe heylofe geiftliche hauffe.

Wie aber vmb das weltliche Regiment? Das war an den Jūden felbs / damals / eben ſo gut/ als an den Heyden/ ſo jhr mechtig waren. Eſaias am 10. ſaget/ Sie machen vnrechte gefetze / vnd ſchreiben vnrechte vrtheil/ auff das ſie die ſachen der armen beugen/ vnd gewalt vben im Recht der Elenden/ vnter meinem volcke/Das die Witwen jhr raub/ vñ die Wayſen jhre beute ſein müſſen.

Sechiel

*7^r

Sechiel. 22. Ihre Fürften find wie reif=
fende Wolffe / blut zuuergiessen / vnd Seelen
vmbzubringen/ vmb jhres geitzes willen.
Miche: am 3. Jhr folts billich fein/ die
das Recht wüften / Aber jhr haffet das gute/
vnd liebet das arge / Jhr schindet jhnen die
haut abe/vnd das fleisch von jhren beinen/ vñ
frefset das fleisch meines volcks / Vnd wenn
jhr jhnen die haut abgezogen habt/ so zurbre=
chet jhr jhnen auch die beine/ etc.
Summa/ was es vor Frömigen wa=
ren/ siheftu / wenn sie mit Johanne/ Chrifto /
vnd den H. Aposteln/ vor gerichte zu Chor
gehen/ erfcheinet auch in diefer Hiftori genug=
sam / wie es damals vmb das Regiment ge=
ftanden / aller ding/ den vorgefetzten Prophe=
tifchen sprüchen gleich. Was aber auch hie
den gemeinen Pöfel belanget / was darff es
viel erweifens? Jch halt man kan es nirgendt
baß mahlen/ deñ es Ofeas am 4. Cap. gemah=
let hat/ Der Herre/ spricht er/ hat vrfache zu
schelten/die im lande wohnen/ Denn es ift kei=
ne trewe/ keine liebe/ kein wort Gottes/ im lan=
de/ Sondern Gotteslethern/ Liegen/ Mor=
den /Stelen/ vnd Ehebrechen/ hat vberhandt
genommen / vnd kômpt eine blutschuld nach
der andern/etc. Also/ das dis/ so Chriftus fa=
get/

*7^v

get/ Sie haben diezeit jhrer heimfuchunge nicht erkandt/ in gemein aller Stende der Jüden funde / vff ein mahl falltet / Wie sie auch alle sampt sich redlich also beweifen / da vnfer lieber Herre Christus (der Rechte Vifitator vnd Heimfucher/ vom Auffgang aus der höhe / Luc. 1.) von jhnen hingerichtet wurde / Die Geiftlichen trieben das Redlin/ Die Weltlichen exquirten / Das gemeine Volck schrey Crucifige zu/ das hieß die zeit der heimfuchung erkandt / vnd waren dennoch allenthalben so gar frey sicher dabey / das sie noch das vnglücke vnd vrtheil vber jhren eygen hals forderten/ Sein blut komme vber vns / vnd vber vnferer kinder / Jch meine aber jha/ es sey kommen / wie diese nachbeschriebene Hiftori/ jhres endelichen verderbens/genugfam zeuget.

III. Als es aber nu weiter an deme/ das wir auch die gelegenheiten jetziger vnferer zeiten/ bey dieses volcks gelegenheit Accommodiren vnd halten/ (damit so viel mehr nutztes daraus erfolge) Wil ich hiemit vor Gott bezeuget haben/ das ich nicht aus luft/ jemandes funde oder schande zuberüchtigen/ Sondern aus hertlicher liebe zur warheit / die jemmerliche gefalt der vnbußfertigen welt / jederman zur warnunge/ vor die augen zu stellen wüntfche/
Ob doch

*8^r

Ob doch bey etlichen (wie dann nicht zu zweifeln) noch möchte rhat geschaffet werden / Vñ thu dis bedingen nicht ohne vrfach / Denn ich gar wol weis / bin auch ehe gewitziget / wie man nicht alleine keinen danck/ sondern auch noch wol feindfchafft/ vnd alles vnglück / verdienet / wo man den schweren rüret / vnd doch damit anders nichts / denn der Leute nutz vnd beftes fuchet/ Der Prophet Micha 2. faget auch also/ Were ich ein lofer Schwetzer/ vnd ein Lügenprediger / vnd predigte wie lie lauffen vnd ſchwelgen ſolten / das were ein Prophet vor dis volck/ etc. Aber wie oben gefaget/ das ſollen vnd wöllen wir/vnd alle Chriftliche Prediger/ nicht achten noch anfehen/ Sondern viel mehr / wie nach Gottes Ehre/ dennoch etlicher nutz vnd frommen/möge gefuchet / Auch hierneben vnſere Conſcientz vnd gewiffen errettet werden/ etc.

Das wir nu an vns / mit dem Spruch CHRifti / auch anheben / achte ich von vnnothen fein / von vnſerer zeiten Gnadenreichen Heimfuchunge / viel zu ſchreiben/ Dann wer ſihet nicht / wie Gott inn dieſen letzten zeiten / gleichſam den Himmel weit / weit / auffgelperret/ vnnd mit allerley Himlifchen güttern

*8^v

gütern herab gefchneyet hat? Wolt Gott/ wir
 köndten die zeit des offenbarten heiligen lieben
 Euangelij / gegen die grawfame blindtheit
 vorigen zeiten/ vnter dem ſchrecklichen finfter=
 nus des Antichrifts/ nur ein wenig rechnen/
 Jch meine ja / wir würden ſagen vnd ſchreyen
 müſſen/ Wir weren auch mit gnaden heimge=
 ſuchet. Hat nicht der Allmechtige/ gütige
 Gott/ mit eitel wunderwercken / der reinen lehr
 des Euangelij / vnter dem Löblichem Chur
 vnd Fürftlichem haufe zu Sachſen / raum ge=
 machet/ vnd von dannen/ wie aus zion/ inn
 die gantze weite welt ausgehen laſſen / wider
 ſo vieler Teufels laruen/ Sophiſten vnd Ty=
 rannen/ ja auch der hellifchen pforten grimmi=
 ges toben vnd wüten? Hat er nicht daneben
 in die 40. jhar / gnedigen friede gegeben/ vnd
 vnfriede geftillet / bis das wort hat wurtzlen/
 wachſen / vnd feinen lauff vollbringen kön=
 nen? Hat ers nicht in dieſen jharen / wider al=
 ler menſchen gedancken / ſonderlich bey dem
 gefchlechte der frommen / wunderbarlich er=
 halten? Es hat doch je auch Gott der Herre
 aller dinge in Deutſchlandt/ eine ſtedte vor ſich
 funden/ zur wonunge dem mechtigen Jacob/
 Wie der 133. Pfalm ſinget / vnd dabey allerley
 herrliche gnade vnd fegen/ ſo dafelbs verheif=
 fen/ an

**1^r

fen / an beyden Regimenten/ mildigklich erzei=
get / Also / das wir die Gnadenreiche heimfu=
chunge/ des lieben frommen Gottes/ nicht we=
niger an vns/ als an den Jüden zu rhümen/
Jha/ so viel mehr an vns/ denn an den Jüden/
so viel mehr die Jüden vns / vieles vorthails
halben/ vorzuziehen.

Aber/wie haben wir doch solche zeit/ der
Gnadenreichen heimfuchunge/ (ymb Got=
tes willen) erkandt vnd gebrauchet?

Wir wöllen hier nicht fagen von Tür=
cken vnd Jüden / denen doch auch der glantz
des H. Euangelions (aber vergeblich) inn die
augen gefchimmert/ Auch nicht von den elen=
den Hunger welche nu mehr / leider / nicht
anders denn wie die Eule / durch die Sonne
Göttliches worts/ verblendet/ Also / das kein
warnen mehr an jhnen hilffet/ noch helffen fol/
bis sie/ sampt all jhrem anhang / vnd helffers
helffern/ (auch hie zeitlich/ ob Gott wil / gar
balde/ nur weidlich herdurch genommen/ vnd
bis auff die blöße geftraffet) inn den fewrigen
pfuel/ Apocal. 19. geworffen werden/ da sol
jhnen Todt vnd Teuffel ewigklich zeigen / wie
sie die zeit der Gnadenreichen heimfuchunge/
erkandt vnd angenommen haben.

Von vns Euangelifchen vnd Newen

** Jraeliten/

**1^v

Jfraeliten /laffet vns dencken vñ fagen/die wir aus Göttlicher verleyhunge / aus dem dienft=haufe des Antichriftifchen Pharaonis/ ins gelobte Landt/ vnd auff die berge Jfraels ausgefüret find / vnd vor allen völkern vnd landen/ allerley oben erzehlete wolthatē/ von Gott dem Allmechtigen/ empfangen/ Vnd also auch mit allen Gnaden heimgefuchet find / Wie haben wir doch erkandt/ vnd erkennen noch / dieselbe zeit/ darinnen wir heimgefuchet findt?
 Von vns Geiftlichen (wie wir billich fein folten) anzuheben / wehre es wol ein ding gewefen/ Wenn die liebe vnd brunft zum Euangelio / (fo im anfang vor 40. jharen/ vnd neher/ inn den leuten war) blieben/ und noch vorhanden wehre/ das man mit reiner rechtfchaffener Lehre/ vnd gebürlichem trewen vleis im Ampte/ zu zimlichen genieß / auch danck vmb die Leute verdienen köndte/ So möchte es wol Prediger / jha ftandthafftige Prediger geben / Dieweil es aber dahin kômpt/ das man nicht allein keinen / oder jhe kleinen danck / mit der aller gröſſſten trewe/ etc. verdient/ Sondern auch dabey darben/ vnd endlich weib vñ kindt/ in großem armut vnd elende/ gar nahe an dem Betteltabe/ nach ſich laffen mus/ So volget/ das entweder jhr gar wenig/ fo

**2^r

nig/ so sich sonsten getrawen zuernehmen/ (Es
 sey denn / das sie wunderbarlich mit Jeremia
 vberredt vnd berücket werden) sich zum Pre=
 digampt brauchen lassen / oder da sie schon
 dazu kommen/ geben sie sich mehrer theils auff
 den bauch/ werden ftumme hunde/ hengen
 den Mantel nach dem winde/ suchen jhr eigen
 Ehr vnd Nutz / Lassen ftreichen was da
 ftreichet/ Vnd damit sie gut fried / ruhe/ vnd
 gemach haben / reden sie was die Leute gerne
 hören/ Oder / so es zum höchften kömpt/ fte=
 chen sie durch den zaun / wo er am weitesten
 ist / das sie ja nicht mit dem kragen behangen/
 Daher kömpts jetzt / da man die gar vbertreff=
 lichen Tugenden / Epykiam / Anmiltiam / vnd
 Adiaphorifterey/ nicht allein in der Lehr / von
 den hohen Artickeln des Glaubens/ vnd Cere=
 monien/ Sondern auch in den Moralibus/ vñ
 gemeinem leben/ (darinnen man auch mit of=
 fentlichen Todtfunden/ als Geitz/ Wucher/
 ehebruch/ ꝛc. difpenfirt) zu mißbrauchen geler=
 net hat/ Das man die Merterer alle/ in Franck
 reich/ Hispanien/ vnd Welfchlandt /relegiert/
 gar wenig ausgenommen / die noch bey vns
 vmb der warheit willen wagen/ was sie sollen.
 Mich düncket/ es gehet jetzt aller ding / wie
 Salomon sagt/ Prouerb. am 27. Ein witziger

** ij fihet

**2^v

fihet das vnglück kommen / vnd verbirget
 sich/ (Jha das kan man jetzt gar meifterlich /
 Ob es aber witz fey/ vnglück fürchten/ wo
 aus ordentlichem befehl / vnd Ampts halben/
 gleich mit gefahr/ etwas zuuorrichten/ das
 laffe ich fie erfahren) Die albern aber gehen
 durch/ vnd leyden Schaden/ Denen ift aber
 auch/ Gott lob / offenbaret / was jhenen witzig=
 gen vnd weyfen verborgen ift/ Ob fie nu
 wol Schaden leyden müffen / darumb / das fie
 der gegenwertigen welt nicht gros achten/
 auch nicht viel zuuerlieren / vnd derohalben
 defto frewdiger vnd ohne furcht/durchgehen/
 wie der gemeine Vers faget/ Cantabit uacuu co=
 y m Latrone uiator. Da andere dagegen mit dem
 Sileno / dem vngehewren Cyclopi Polypho=
 mo/ inn der Speluncken diefer argen welt/
 heuchlen / aus forge / fie möchten gefreffen
 werden/ Wolan/ fo gehe es im Namen Got=
 tes/ Dennoch wiffen wir auch/ das Salomo
 am 22. Cap. bey gleichem Spruche faget / Wo
 man Schaden leidet/ in der furcht des Herrn/
 da ift Reichthumb / Ehre / vnd leben.
 Jch fchweige hier / der Ergernus im le=
 ben/ jha auch des aller größften Schadens/ fo
 etliche der vornemften jetziger zeit/ Nötigen
 eyuer der lieben vngenehmen warheit hindan
 gefetzt/

**3^r

gefetzt / mit inflectiern vnd corrumpiern reiner
 Chriftlicher Lehre/ angerichtet/ Denn folches
 Gott lob/ ohne das/ genugfam/ vnd mit rei=
 chem redlichem grunde ausgeführet / wenn
 man fonft nicht mutwillig mit lehenden au=
 gen blindt fein wolte/ Summa/ nimme vor
 dich / die oben angezeigte Sprüche/ von dem
 verderbetem Geiftlichem Stande der Jüden/
 du wirft befinden / das ein Ey dem andern
 kaum fo gleich fey / als diefes fals jetzige vnd
 jhene zeit/ einander find.

Wie aber ferner vmb den Weltlichen
 Standt / eine herrliche / heylfame / nützlichel/
 vnd nôtige Ordnung Gottes ift die Obrig=
 keit/ welche kein geift/ denn des Teuffels vnd
 Antichrifts leftert/ Aber doch/ was
 hieran ftrefflich ift / kan auch niemandt lo=
 ben / billichen oder vertheidigen / Er fey denn
 eben deffelben geiftes. Zwar die gemeinen
 funden / ergern die Regiment / vnd erwecken
 ftraffen/ Aber mit eines andern boßheit ift
 kein böfer entfehuldiget.

Jch forge leider / es gehe hie zu / wie
 Amos am 6. Cap. klaget / Jhr regieret mit
 freuel/ vnd liget dieweil auff Elffenbeinen
 betten / Jhr effet das befte aus der Herde/ vnd
 die gemefeten Kelber/ Vnd fpielet auff dem

** iij Pfalter/

**3^v

Pfalter/ vnd ertichtet euch lieder wie Daid/
Vnd trincket Wein aus Schalen / vnd falbet
euch mit Balfam/ vnd bekümmert euch nichts
vmb den ſchaden Joſeph. Nach dieſen vnd
andern obangezeigten der H. Propheten klage=
ſprüchen / ſpiegelen ſich doch/ vmb Gottes
willen/ vnſere Euangelifche Regenten/ vnd be=
dencken / wie auch ſie die Gnadenreiche zeit jrer
heimfuchung erkandt vnd angenommen haben/
vnd noch / befonders inn den beiden heuptfü=
cken jhres Amptes / ſo Amos hier berüret/ Jhr
Regiment ſolt ohne freuel gehen/ Gotte zu
ehren/ den Frommen zu ſchutz / den böſen zur
ſtraffe/ ſo kommẽ ſie dazu / weiß ſie es gelüftet/
Jr pracht vnd wolluft/ darauff ſie ſich meh=
rer theils geben/ nimpt nicht allein Rhat vnd
Rend/ das ſchier weder ſack noch zipfel reich=
en will/ Sondern auch zeit vnd weil/ das hie=
uor weder gericht noch Gerechtigkeit mag ge=
fördert werden/ Sonderlich / wo Wittwen vñ
Weißen inn nöthen ſtecken/ die nichts inn die
büchſen zu faffen haben. Was aber die forge
vor den ſchaden Joſeph/ das iſt / die noth
der armen/ elenden/ vnd allezeit von der Welt
vorlaffenen kirchen / (ſo jhnen vornemlich ge=
bürete) anlangen thut/ derſelben vornemften
höchſter ſchatz / iſt Gottes wort/ das ſie das=
felbe

**4^r

selbe lauter vnd rein habe vnd höre/ Sorget
 man nu hierumb fast / so wirt mans inn kur=
 tzen jharen wol jnne werden/ Jch wüfte aber
 nicht/ wer es in Kirchen vnd Schulen lehren
 kōndte/ dieweil nicht allein gar wenig dazu ge=
 zogen vnd vnterhalten werden. Sondern auch
 die/ so erzogen sind/ jemmerlich allenthalben be=
 drenget/ vnd wo sie zu laut ruffen wōllen/ wi=
 der Offentliche schandtlaster / ausgetriben/ vñ
 ins elend geflossen werden/ Wil geschweigen/
 das man durchaus / der reinen warheit/ jhe so
 vberdrūffig worden/ als die Jūden des Man=
 na in der wūften / Auch mit groffem fleis sich
 mühet/vmb leife Ohrenkrawer/ die Obrigkeit
 vnd vnterthanen zum Teuffel führen / auch
 hie zeitlich in jamer vnd noth brengen helffen/
 Vnd wie Jeremias saget/ Sie alle zum lande
 hinaus predigen/ Jch schweige hier auch / das
 etliche gar Epicurer werden/von einer Religi=
 on/ so viel als von der andern/ das ist/ von kei=
 ner nichts halten/ mit dem namen vñ bekentnus
 wōllen sie gut Euangelisch sein / (Trotz einem
 der sie anders schūldiget) mit der that aber/hen=
 gen sie sich/ hie vñ dort/ an die Papisten/ Ma=
 chen sich etwa dem Antichrift/ mit auff vñ an=
 nemunge jrer Geiftlofen Biftumb/ vnd Pfaf=
 fereyen/wideruñ anhengig/ Trincken also mit
 ** iijj der

**4^v

der Babilonifchen Huren/ den wein des zorns
 Gottes/ Apocal. 14. Wiſſen doch/ oder ſol=
 ten jhe wiſſen / das hierauff anders nichts /
 denn ewige qual/ mit feuer vnd ſchwebel / inn
 der Helle folgen mus. O Jammer vber
 jammer/ Jetzt iſt die zeit / da die Himliſche
 Stimme ruffet / Apocal. 17. 18. Gehet aus
 von Babylon / mein volck / das jhr nicht
 theilhaftig werdet jhrer funden / Auff das jhr
 nicht empfahet etwas von jhrer plagen / Denn
 jhre funde reichen bis an den Himmel/ vnd der
 HERRE dencket an jhren freuel / Vnd ſihe /
 man gehet hie vnd dort zu jhr ein. Jetzt
 iſt die zeit / das wir alle vber dem gefürtzetem
 Bapftumb vnd Antichrift (des leiblicher vn=
 tergang auch gewiſſlich gar nahe iſt) frolo=
 cken / vnd vns frewen ſolten/ Vnd ſihe / man
 ftützet vnd ftönet noch dran/ mit grewlichem
 beyfall / zu jemmerlichem hertzenleidt vnd be=
 trübnus vieler frommen Chriſten/ jha des hei=
 ligen Geiſtes ſelbs/ ſo inn jhnen wohnt. O
 Herre Gott/ Heiffet das die felige zeit der Gna=
 denreichen heimfuchunge erkandt?
 Eben des iſt es aber auch endlich mit
 dem gemeinen hauffen/ Man mache die
 rechnunge/

**5^r

rechnunge / nach allen geboten Gottes / vnd
 dencke / wie doch die Leute leben / bey dem hel=
 len Liechte des reinen heiligen Göttlichen
 wortes / man wird finden / bey jung vnd alt/
 klein vnd groß/ arm vnd reich / etc. Summa/
 durch aus/ do es nicht erger / das es doch jhe
 so arg / als es jimmer bey den Jüden gewefen
 ift/ Ach Schande ift zu Tugendt worden/
 Befchlieffe derhalben mit hertzlichem feufftzen/
 fampt dem heiligen Propheten Micha / am 7.
 Cap. Ach es gehet / als wenn man inn einem
 Weinberue nachliefet / da man keine drauben
 findet zu effen / vnd wolte doch gerne der be=
 ften fruchte haben/ Die frommen Leute find
 hinweg im lande / vnd die Gerechten find ni=
 cht mehr vnter den leuten / Der befte vnter
 jhnen / ift wie ein dorne/ vnd der redlichfte
 wie eine hecke/ Was volget aber dafelbs?
 Aber wenn der tag deiner Prediger kommen
 wirdt / wenn du heimgefuchet folt werden/
 Da werden fie denn nicht wiffen / wo aus.
 Aus diefem / als einem guten grunde/
 wöllen wir nu (all die weil vnferre heimfuch=
 unge / wo nicht vortrefflicher / dennoch der
 Jüdifchen gleich / Auch die verachtung der=
 ** v felben/

**5^v

felben/ bey vns je fo gros als bey jhnen/wo ni=
 cht größer) weiter krefftigklich fchlieffen/ das/
 da nicht eilendes bulße volget/ man nichts ge=
 wiffers / dann eine vngnedige heimfuchunge/
 Göttliches zorns/ vñ groffer grewlicher ftraf=
 fen zugewarten habe / wie Pfalm. 89. drawet/
 So fie meine ordenunge entheiligen/ vnd mei=
 ne Gebote nicht halten/ So wil ich jhre Sün=
 de mit der Ruten heimfuchen / vnd jhre miffe=
 that mit plagen / Eben wie S. Paul. Rom. 11.
 dergleichen fchleuft/ Hat Gott der natürlichen
 zweige nicht verfchonet / das er vnfer als der
 eingepropften etc. auch nicht fchonen werde/
 Nicht viel wort/ vnternimpt es nicht der jün=
 gfte tag / (darumb wir dann teglich bitten vnd
 feufftzen) fo ift doch die vorwüftende ftraffe/
 mit dem fchôn auffgerichtem grewel / fo gar
 gewiß vorhanden / das nichts gewiffers fein
 kan/ Vnd das deme alfo / nemen alfo fromme
 Chriften ab/ nicht aus einem/ fondern viel be=
 ftändigen gründen/ dauon hie nicht zeit noch
 raum ift weiter zu handeln/Ohne das wie fie/
 Gottfeligen hertzen zu gut/ nur andeuten mô=
 gen/ j. Erflich kan jhe Gottes wort nicht erie=
 gen Cap. 6o. Welche volcker oder kônigreiche
 dem HERrn nicht dienen wóllen / die follten
 vmbkomen / vnd die vólcker verwüftet wer=
 den.

**6^r

den. 2. Darnach ftehen da die gleichnus/ Mat. 22. von der hochzeit/ Lu. 14. vom Abentmal. Mat. 21. vom weinberge/ Lu am 13. vom Feigenbaume/ Man hat nicht gewolt/ Sihe was volgẽ mag. 3. So find die Exempel aller zeiten je auch vorhanden/ Jfts nicht Alia/ Affrica/ Grecia/ (Jüdischen landes gefchwiegen) inne worden/ was auff verachtung der gnadenreichen heimfuchung gefolget? Meinen wir deñ das wirs allein beffer haben werdẽ? 4. Jch wil hie gefchweigẽ/ fo vieler zeichen/ dadurch vns Gott teglich vorftehender ftraffen/ da man nicht buffe thut/an allen Elementen etc. erinnert/ 5. Jch wil auch gefchweigen der Propheceyen vieler hocheleuchter Leute/ fonderlich vnfers deutſchen Propheten Lutheri/ (beider hat man ganzẽ Bücher voll) welche/ wie ſie treffen/erferet man alle tage. 6. Dis einige gemercke / Luce. 11. Von inwendigen vneinigkeith / das man ſihet / die jemerliche zwiefpalt/ fo allenthalben im Kirchen vnd weltlichem Regiment einfellet / folte doch / meine ich/ etwas erinnern/ Sintemal auch die erfahrungẽ gibet/das falſche lehr vnd inwendige vneinigkeith/ alleweg ein gewiß anzeigen ift/ Göttilchs zorns vnd verwüftungẽ defelben landes/ Summa nichts gewiffers deñ endtliche ftraffe vnd verwüftung.

Wie

**6^v

Wie aber vnd durch wen / der Allmech=
 tige/ folche ftraffen ausrichten werde/ fey jhme
 dem lieben Gotte beuohlen / Er hat Hencker
 vnd Sockmeifter fatt / am Bapft vnd Tür=
 cken / dauon vns Gottes wort/ fonderlich A=
 pocal. 20. Ezech. 38. vnd 39. nicht wenig
 drawet / Doch allewege also / das das fpiel
 entlich vber fie ausgehe/ So kan Er auch aus
 vns felbs/ einen Attilam erwecken/ wie wol ehe
 gefchehen ift / Vnd ifts jha an deme noch zu
 wenig / fo hat Er noch Todt vnd Teuffel
 felbs / wie ficher vnd freche auch dis alles die
 Gottlofen verachten vnd fpotten.

Das wir aber hier/ mit dem nutze fol=
 IIII.

cher warnungen / die Gott den Menfchen
 durch zeichen / Exempel/ vnd fein wort / vor
 den ftraffen offenbaret / endtlich befchlieffen/
 Mögen nu böle vnd fromme/ auff jhre fchan=
 tze/ nur wol acht geben/ Denn beyden gilts/
 wie offft gefaget/Den böfen/ das fie jhre ficher=
 heit/ funde/ vnd mutwillen abtellen/ fich nach
 dem Exempel der Niniuiten/ inn warer furcht
 Gottes/ zu rechtchaffener Buße (dazu fie
 Gott gnediglich locket) fchicken/ Dann al=
 lein vff diefen weg/ ift der fache zu rhaten/ vnd
 fonften

**7^r

fonften nicht/ Dauon denn andere trewe Buß=
 predigten/ auch inn diefen zeiten/ viel gefchrie=
 ben / vnd vermanet haben / Werden fie aber
 das noch / wie bis hero / verachten / vnd die
 ftraffen volgendts angehen laffen / (wie ich
 leyder forge) Also/ das dann keins rhatens
 mehr ift/ Wie Zachar. 7. vnd Prouerb. 1 ge=
 drawet wirdt/ Wolan / fo fey auch ich armer
 Diener Gottes/ an jhrem verderben entfchül=
 diget / Denn ich habe hiemit auch mein wehe/
 fampt Jefu Anani/ vber Hierufalem geruffen/
 Sie findt vberzeuget/ jhr blut komme vber jren
 kopff/ Sie mögen erfahren/ was fie nicht gleu=
 ben wolten.

Die Frommen aber / follen folche war=
 nungen / auch mit vleis betrachten / damit/
 wenn das vnglück kömmet / fie fich weder an
 der ftraffe noch an den Gottlofen Executorn
 derfelben/ fo hierzu glücke vnd muth dörrffen/
 (welches denn fchmertzlich anzufehen) ergern/
 Wie man fpricht / Tæla præuifa minus nocent.
 Hierbey follen fie auch / durch gewiffen troft
 Göttliches worts / fich zur gedult vnd beften=
 digkeit gewehnen / das fie im vnglücke nicht
 kleinmütig werden / nicht abfallen / noch ver=
 zagen/ Sondern fagen mit Micha/ am 76

Cap.

****7^v**

Cap. Ich wil des HErrn zorn tragen / denn
ich habe wieder jhn gefündiget. Seyen aber des
gar gewiß/ das Gott jhr / auch mitten in dem
vnglücke / nicht vorgelassen werde/ Sondern
daraus erretten / oder jhe gnedige milderung
darinnen vorleyhen/ des man deñ allenthalben
inn der schrift / vnd auch inn dieser historien/
schöne Exempel findet / Endlich/ sollen sie
auch hierdurch zu hertzlichem feufftzen vnd
innigem gebete/ vor sich/ vnd die jhrigen/ ja
vor die gantze Christliche kirche/erwecket wer=
den/ das der so auff der wolcken sitzet/ Apoca.
14. In feinem zorn seiner barmhertzigkeit in=
denck sein vnd bleiben/es nicht alles sampt hin=
weg rafften/ Sondern jhme eine ewige Kirche
vnter vns erhalten/ auch endlich mit fei=
ner Sichel anschlaghen/ vnd vns gne=
diglich erretten/ vnd felig ma=
chen wölle/ Amen.

Vnd das sey auch gnung vom Nutz
solcher warnungen auffs kurtzest angezeigt/
Solches aber alles/ Edeler/ Wolgeborener/
Gnediger Graue vñ Herre/ schreibe. E. G. ich
zu sampt dieser meiner geringen Arbeit vnter=
theniglich zu/nicht allein/das dis mein schrei=
ben/

**8^r

ben / gemeinem brauch nach / einen Chriftli-
 chen Patronum habe/ Sondern/ das ich auch
 meine vnterthenige danckbarkeit vnd liebe/ fo
 E. G. in mir durch jhre Gottfelige Chrift=
 liche vnd gar gnedige gemeinfchafft/ inn fchr=
 ifften vnd gegenwertigklich / erwecket haben/
 etwa mit beweifete/ vnd an tag gebe/ Son=
 derlich / dieweil mir gar wol bewußt/ das E.
 G. inn vorftehenden fehrligkeiten/ (der die
 welt fo wenig achtet vmb die reine lehre/ vnd
 arme kirche/ nicht wenig forge tragen/ Wünt=
 fchen vñ wolten freylich felbs auch / nichts lie=
 bers/ (da es möglich) denn das durch folche
 warnungen / bey jederman / warhaftige buf=
 fe/ vnd alfo abfchaffung der ftraffen zuerhal=
 ten/ Deßen auch E. G. vor fich vnd die ih=
 ren (wie es auch komme) ohne allen zweifel
 empfindtlich genieffen werden.
 Vnd wiewol E. G. diefe vnd ande=
 re Hiftorien auch inn höhern fprachen/ deren
 E. G. etlicher viel kündig/ lefen kündten/ So
 habe doch/ vnter E. G. Chriftlichem namen/
 ich folche in gemeiner deutlicher fprachen aus=
 gehen laffen wöllen/ damit auch E. G. gemei=
 nes nutz/fo hieraus bey fromen guthertzigen
 Chriften

**8^v

Chriften erfolgen mag / theilhaftig gemacht
würde/ Zu deme/ da inn diefer Hiftorien man=
nicherley fchöne Exempel / vnd viel bedenk=
liche Regiments lehren / berüret/ Wündifche
ich von hertzen/ das folche durch E. G. auch
andern bedenklich vnd nütze gemacht wer=
den.

Hiemit gantz demütig vnd vnterthenig
bittende/ E. G. wöllen diefe meine geringe ar=
beit/ gnediglich vermercken vnd annehmen/
Vnd alfo Gotte dem Allmechtigen / fampt
jhrem Chriftlichem lieben Gemahel/ junger
Herrfchafft/ Landen/ Kirchen/ vnd derfelben
getrewen Lehrern / inn langwirigen gnedigen
fchutz/ zum aller trewlichften beuohlen fein
vnd bleiben / Amen. Datum Rudolffftadt
an der Saala / am tage Joannis Baptifte/
Anno 1560.

E. G.

Dienftwilliger
Bartholome Gernhart /
zu Rudellftadt
Pfarrherr.

Nn3^r

Die Jüdifchen Mon=
den halten fich gegen die vn=
fern faft alfo.

Der	Nifan		Mertz.
mo=	Jiar		Aprill.
nat.	Siuau		May.
	Thanus		Brachmon.
	Ab		Hewmon.
	Elul	Jft bey	Augftmon.
	Tifchri	vns der	Herbftmon.
	Marchefuan		Weinmon.
	Cisleu		Wintermon.
	Tebeth		Chriftmon.
	Schefat		Jener.
	Adar		Hornung.